

Канон чтомый за болящего

Песнь 1 Ирмос: Пресекаемое море жезлом древле, Израиль пройде яко по пустыни, и крестообразно яве предуготовляет стези. Сего ради поим во хвалении чудному Богу нашему, яко прославися. Припев: Милостиве Господи, услыши молитву раб Твоих, молящихся Тебе. В день печали, нашедши на ны, к Тебе, Христе Спасе, припадающе, Твоея милости просим. Облегчи болезнь раба Твоего, изрекши нам яко и сотнику: иди, се здрав есть отрок твой. Припев: Милостиве Господи, услыши молитву раб Твоих, молящихся Тебе. Мольбы и моления, с воздыханием к Тебе вопием, Сыне Божий, помилуй нас. Воздвигни со одра лежащего, яко расслабленного словом: возьми одр твой, глаголя, отпущаются ти греси твои. Слава: Твоего, Христе, образа подобно поклоняющегося, верою целую, и болящему здравия просим, подражающе кровотоочивей, яже подолыла риз Твоих коснуса, и исцеление недуга прият. И ныне: Пречистая Госпоже Богородице, всем известная Помощница, не презри нас к Тебе припадающих, моли яко блага Твоего Сына и Бога нашего, дати здравие болящему, да Ты с нами прославляет.

Песнь 3 Ирмос: Иже от не сущих вся приведей, словом созидаемая, совершаемая духом, Вседержителю Вышний, в любви Твоей утверди мене. Припев: Милостиве Господи, услыши молитву раб Твоих, молящихся Тебе. Иже от тяжких болезней на земли повержен, к Тебе, Христе, с нами вопиет, подаждь здравие телеси его, яко же Иезекии плакавшемуся к Тебе. Припев: Милостиве Господи, услыши молитву раб Твоих, молящихся Тебе. Призри, Господи, на наше смирение, и не помяни беззаконий наших, но веры ради болящего, яко прокаженного словом исцели ему болезнь, да Твое, Христе Боже, славится имя. Слава: Церковь, юже еси освятил, на ту, Христе, не даждь поношения, но воздвигни невидимо в недуге на одре лежащего, в нейже молим Ти ся: да не рекут невернии, где есть Бог их. И ныне: К Твоему пречистому, Богородице, образу руке воздеюще вопием, услыши раб Твоих молитву и спаси в болезни лежащего, да от болезни востав, воздаст обеты, яже в печали глаголаша уста его.

Седален, глас 8-й: На одре греховней лежаща мя, и страстями уязвена, и якоже воздвигл еси Петрову тещу и спасе расслабленного носима со одром, тако и ныне посети, Милостиве, болящего, понесый недуги рода нашего. Тебе Единого вемы, терпелива и милосерда, милостива Врача душам и телесем, Христа Бога нашего, наводяща недуги и паки исцеляюща, подавающа прощение кающимся о согрешениях, Единого Милосердаго и Милостиваго. Слава: Аз грешный плачуся на одре своем лежа, прощение ми подаждь, Христе Боже, и от болезни сея воздвигни мя, и яже есмь от юности грехи сотворил, избыти ми сих молитвами Богородицы даруй. И ныне: Умилосердися и спаси мя, воздвигни мя от одра болезненного, мощь бо моя во мне изнеможе и весь нечаянием одержим есмь, Мати Божия Пречистая, исцели недугующа люте, Ты бо еси Помощница Христианом.

Песнь 4 Ирмос: Положил еси к нам твердую любовь, Господи: Единороднаго бо Твоего Сына за ны на смерть дал еси, темже Ти зовем благодаряще: слава силе Твоей, Господи. Припев: Милостиве Господи, услыши молитву раб Твоих, молящихся Тебе. Уже отчаянна лютым недугом и к смерти приближившася, возврати, Христе, на живот и даждь плачущимся утеху, да вси прославляем Твоя святая чудеса. Припев: Милостиве Господи, услыши молитву раб Твоих, молящихся Тебе. К Тебе, Творче, каемся в своих гресех, яко не хошеши смерти грешничи, оживи, уздрави болящего, да востав послужит Ти, исповедуя с нами Твою благодать. Слава: Слезы Манассины, Ниневитян покаяние, Давидово исповедание примим, вскоре спаси еси, и наши молитвы ныне прими, даждь здравие болящему, о нем же Ты молим. И ныне: Подаждь нам Твою милость, Госпоже, всегда на Тя надеющимся, испроси здравие болящему, врачевнии Твои руке с Предтечею, Богородице, ко Господу Богу простирающих.

Песнь 5 Ирмос: На земли Невидимый явился еси, и человеком волею сожил еси Непостижимый, и к Тебе утренующе, воспеваем Тя, Человеколюбче. Припев: Милостиве Господи, услыши молитву раб Твоих, молящихся Тебе. Дщерь Иаириу уже умершу, яко Бог оживил еси, и ныне возведи, Христе Боже, от врат смертных болящего, Ты бо еси Путь и Живот всем. Припев: Милостиве Господи, услыши молитву раб Твоих, молящихся Тебе. Сына вдовича оживив Спасе, и тоя слезы преложив на радость, спаси от недуга тлеющего раба Твоего, да и наша скорбь и болезнь на радость придет. Слава: Огненную болезнь тещи Петрове прикосновением Твоим исцели, и ныне возстави болящего раба Твоего, да востав яко Иона, послужит Ти. И ныне: Скорбнии, смиреннии, грешнии, не имущи дерзновения к Тебе, Пречистая Богомати, вопием, умоли Сына Твоего Христа дати болящему здравие телеси.

Песнь 6 Ирмос: Бездна последняя грехов обыде мя, и исчезает дух мой: но прострый, Владыко, высокую Твою мышцу, яко Петра мя, Управителю, спаси. Припев: Милостиве Господи, услыши молитву раб Твоих, молящихся Тебе. Бездну милосердия и милости имея, Христе Боже, услыши моления раб Твоих. Ты бо еси Петром Тавифу воскресил, Ты и ныне в болезни лежащего воздвигни, послушав церковных молитвенник. Припев: Милостиве Господи, услыши молитву раб Твоих, молящихся Тебе. Врачу душам и телесем нашим, понесый недуги всего мира, Христе, и Енея Павлом исцеливый, Ты и ныне болящего исцели святых апостол молитвами. Слава: Преложи, Христе, на радость рыдание о недужнем скорбщем, да Твою получивше милость, внидут в дом Твой со обетными дарми, славяще Тя в Троице Единого Бога. И ныне: Приидите, о друзи, поклонимся молящся о болящем Божией Матери. Та бо имеет власть недужных исцелити, со безмездником вкупе, духовным невидимо помазующе маслом.

Кондак, глас 3-й: Душу мою, Господи, во гресех всяческих, безмездными деяньми расслаблену воздвигни божественным Твоим человеколюбием, яко же и расслабленного воздвигл еси древле, да зову Ти спасаем: щедре Христе, даждь ми исцеление.

Икос: Иже руки Своей горстию содержай концы, Иисусе Боже, Иже Отцу собезначальный и Духу Святому совладычествуя, яко плотию явился еси недуги исцеляя и страсти очистил еси, слепяя просветил еси, и расслабленного словом Божественным совоставил еси, сего право ходяща сотворив и одр повелел еси на раму взяти. Темже вси с ним воспеваем и поем: щедре Христе, даждь ми исцеление.

Песнь 7 Ирмос: Прежде образу златому, персидскому чтлишу отроцы не поклонившася, трие поюще посреде пещи: отцев Боже, благословен еси. Припев: Милостиве Господи, услыши молитву раб Твоих, молящихся Тебе. О, Кресте Пресвятый Христов, честное Древо Животное. Тобою смерть погуби и мертвни воскресоша, и ныне болящего изцели и оживи, якоже при Елене умершую девуцу. Припев: Милостиве Господи, услыши молитву раб Твоих, молящихся Тебе. Долгую и лютую болезнь Иовлю на гноищи и в червех, того молящася, словом изцелил еси, Господи. И ныне же в церкви о болящем молим Тя: яко благ, изцели невидимо молитвами святых Твоих. Слава: Все вемы, яко умрети нам есть, Тебе Богу тако изволившу, но на мало время, Милостиве, здравия просим болящему, премени от смерти на живот, даждь скорбящим утеху. И ныне: Пособствуй и помогай нашему сиротству, Богородице, Ты бо веси время и час, когда умолиши Сына Твоего и Бога нашего, дати болящему здравие и прощение от всех грех.

Песнь 8 Ирмос: Служити Живому Богу, в Вавилоне отроцы претерпевше, о мусикийских органах нерадиша, и посреде пламене стояще, боголепную песнь воспеваху, глаголюще: благословите вся дела Господия Господа. Припев: Милостиве Господи, услыши молитву раб Твоих, молящихся Тебе. Милость покажи, Владыко, в болезни раба Твоего, и скоро изцели, милостиве Христе Боже, и аще смерти не предаждь судней, да Ти покаяние воздаст. Сам бо рекл еси: не хочу смерти грешничи. Припев: Милостиве Господи, услыши молитву раб Твоих, молящихся Тебе. Господи милостиве, Твоя преславная чудеса да и до нас ныне достигнут: бесы прожени, недуги погуби, раны изцели, болезни уврачуй, и потворы и чародеяния и всякия язи избави ны. Слава: Запретивый, Христе, морским ветром, и страх ученик на радость преложивый, и ныне запрети тяжким болезнем, труждающим раба Твоего, да вси возвеселимся хваляща Тя во веки. И ныне: Избави, Богородице, от обидевших ны печалей, различных недугов, отравы же и чародейства, и бесовскаго мечтания, и от навета злых человек и от напрасныя смерти, молим Ти ся.

Песнь 9 Ирмос: На Синайстей горе виде Тя в купине Моисей, неопально огнь Божества заченшую во чреве: Даниил же Тя виде гору несекую, жезл прозябший, Исайа взываше, от корене Давидова. Припев: Милостиве Господи, услыши молитву раб Твоих, молящихся Тебе. Источник жизни, подателю, Христе, милости, не отврати лица Твоего от нас. Облегчи болезнь утруженному болезнию, и воздвигни яко Фаддеом Авгаря, да присно Тебе славит от Отцем и Святым Духом. Припев: Милостиве Господи, услыши молитву раб Твоих, молящихся Тебе. Евангельскому верующе гласу, Твоего ищем обета, Христе: просите бо, рече, и дастся вам. Тем и ныне предстояще молим Тя, возстави со одра здрава лютым повержена недугом, да Ты с нами вкупе величаеш. Слава: Мучимый недугом, внутрь невидимыми ранами, Тебе, Христе, с нами вопиет, не нам, Господи, не нас ради, вси бо мы исполнены грехов, но Матерними Твоими и Предтечевыми молитвами даждь исцеление болящему, да Ты вси возвеличим. И ныне: Божия Мати Пречистая, со всеми святыми призываем Тя, со ангелы и архангелы, с пророки и патриархи, со апостолами, с преподабными и праведными молиси Христу Богу нашему дати здравие болящему, да Ты вси величаем.

Молитва Боже сильный, милостно строй вся на спасение роду человеческому, посети раба Твоего сего (имя), нарицающа имя Христа Твоего, исцели его от всякого недуга плотскаго: и отпусти грех и греховныя соблазны, и всяку напасть, и всяко нашествие неприязнено далече сотвори от раба Твоего. И воздвигни от одра греховнаго, и устрой его во святую Твою Церковь здрава душою и телом, и дела добрыми славящаго со всеми людьми имя Христа Твоего, яко Тебе славу возсылаем, со Безначальным Ти Сыном и со Святым Духом, ныне и присно и во веки веков. Аминь.